

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA NOVEMA 2021

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

FAAU'UGA KOLISI FAAFAIFE'AU MALUA 2021



Rev. Teratabu Takaria, Tekimatang I. Uilelea (Faletua Taitaifono Fono Tele), Beretia Unnang. O A'oa'o mai le Uniting Church Kiribati, na faau'u ma faailoga BD Honors.

FAASINO UPU

1. O LE LAUGA	2
2. FAAU'UGA FAAI'UASO MALUA	4
3. OLE PEROFETA MULIMULI	6
4. MEA'AI TATAU MA LE ASO	9
5. FOAI A LE EFKS LAULII	12
6. FOAI SMT MO MALUA	12
7. OSIGA FEAGAIGA EFKS ALAFUA	13
8. O AU AFIGALE SULU I O'U VAE	13
9. O E UA FAI I LAGI FOLAUGA	14

O LE LAUGA

Tusi Faitau: Luka 17:11-19

Matua: Luka 17:15-16, “¹⁵O le tasi o i latou, ua na iloa ua faamaloloina o ia, ona toe foi mai lea o ia, ua vivii atu i le Atua ma le leo tele; ¹⁶ua faapa'ū faō ia i ona vae, ua faafetai mai ia te ia; o le Samaria foi o ia.”

Manatu Autū: **Toe Fo'i e Fai le Fa'afetai.**

O le masina o Novema, i le Aso Tofi mulimuli o le masina, ua fa'amamaluina e le malo o Amerika lea aso ma fa'aigoaina ai, o le Aso Fa'afetai (Thanksgiving Day). Na ulua'i fa'amamalu, ma avea ma tulafono mautū e le peresitene o Amerika, Aperamo Linikone, i le tausaga 1863. O lea lava o loo fa'aauau ua o'o mai i leni tausaga. O le tasi o fa'amoemoe o le Aso Fa'afetai, e pei ona finagalo ai le ali'i peresitene o Linikone, ina ia toe fa'afo'i i le Atua le agaga fa'afetai, ona o Lana tausiga i le malo o Amerika. Ma, e ui ina sa feagai Amerika ma se taua fa'alotoifale, (*Civil War*), ona o le fa'aailoga tagata ma le fefulituaa'i o ona tagata-nu'u, ma i'u lava ina si'i taua mai isi sitete i isi sitete. A o le tatalo i le Atua ina ia fa'amālōlō i latou uma o ē sa manunu'a, ma maliliu, ona o lo latou fetaua'iga. E ui i vevesiga, ae sa manatu lava le ali'i peresitene o Aperamo Linikone, e tatau pea lava ona fa'afo'i i le fa'afetai i le Atua.

Atonu o se lagona fo'i lena na o'o ifo i le tasi o tagata lepela lea na fa'amalolo e Iesu e pei ona fa'amatalaina e Luka. I se vaega o le Tusi faitau, ua ui ane Iesu i Samaria ma Kalilaia e aga'i atu i Ierusalem. Ua o'o lana faiga malaga i se tasi a'ai,

a ua fa'alogo atu i le vala'au leo tele mai o tagata lepela to'asefulu o loo i le ala. Ua latou tutū mamao mai, ma vala'au atu ia Iesu, “*Le Alii e, Iesu, ia e alofa mai ia te i matou.*” Ona o i latou o tagata lepela, e tusa ai ma Tulafono a Mose, e tatau ona ave 'ese fa'amalosi o tagata lepela ma fa'anofa i se nofoaga i tua atu o le a'ai, po o se isi nofoaga tu'ufua, ina ia 'aua ne'i militino fa'atasi ma le tagata lautele o le a'ai. Ona o le fa'ama'i e fai sina mata'utia. O le ala foi lena na latou tūtū mamao atu ai ma vala'au leo tele ia Iesu ina ia alofagia i latou.

Ua alofagia e Iesu lo latou augani atu, ona Ia fetalai atu lea ia te i latou, “*Ina o ia, ia fa'aali atu outou i ositaulaga.*” Ona fai mai lea o Luka, “*Ua latou o, ona faamamāina lea o i latou.*” O le fesili tele ua tula'i mai, Po o anafea tonu na fa'amalolo ai e Iesu le ma'i lepela mai ia tagata e to'asefulu? Auā e lē o faamatala mai e Luka le mamao o loo aumau ai le 'au ositaulaga lea na fa'atonuina e Iesu e latou te o e va'ai? Pau le tala ua fai mai, “Ua latou o...”

E tāua tele lo tatou faimea faalogo i le Atua, e lē gata ina ia tatou maua ai Lona manuia, a ia tatou molimauina foi Lona mana faaola ma Lona mana lavea'i. E tāua lo tatou usita'i i le Atua. O le to'atele fo'i o tatou, ua tatou lē fia faalogo i le si'ufofoga, po o le fa'asinomaga a le Atua. E 'augofie e fa'alogo i le Atua pe a tatou manuia ai, ma fetau tonu ma le tulaga lea ua tatou manatu i ai. A e afai la e fete'ena'i le finagalo o le Atua ma o tatou lava loto po o nisi o tatou fa'amoemoe fa'ale-tagata, ona te'i a lea ua tatou fa'amisamisa, pe fai se auala ina ia fa'afaigata ai ona fa'atino le finagalo o le Atua, ina ia fa'afaigofie ona fa'ataunu'u tulaga ua tatou manatu i ai. Afai o lea, o lona uiga ua tatou faafiapoto i le Atua. E lē se tulaga lelei lo tatou faafiapoto i le Atua.

O lea la ua o atu lepela e to'asefulu i le 'au ositaulaga, ma ua faamalolo e Iesu o latou ma'i faigatā. Ma o lea ua mae'a lelei ona toe fa'aleleia, ma fa'amamāina o latou tagata, e tusa ai ma aiaiga o le Tulafono a Mose. O le fa'amoemoe, ina ia mafai ona toe ulufale atu i latou i le sosaiete masani, ma toe faimea fa'atasi ma tagata lautele. A o le faatonuga o le Tulafono a Mose mo le faamamāina o so o se tagata lepela, e fitu (7) aso e tatau ona nofo 'ese ai, ma fa'atino nisi o taulaga mu, ma isi ituaiga taulaga, fa'atasi ma isi o galuega mo le fa'amamāina. Ona mafai ai lea ona ta'ua o ia, o se tagata ua mamā, ua le o toe i ai le ma'i o le lepela ia te ia, ma lona tino atoa.

O lea ua iloa e le To'atasi lea mai le to'asefulu o le 'au lepela, ua faamamāina o ia. Atonu sa ia uia atoa tu'utu'uga ia e pei ona folasia e le Tulafono a Mose. Atonu sa manatu foi le To'atasi lea, ua tuana'i le fitu o aso talu na fa'amālōlō i latou uma e Iesu i Lana fetalaiga tu'usa'o. A e, e lē o nofo lelei si alii. Auā ua i ai lava le agaga o lea To'atasi, e tatau ona fa'afo'i le Vi'iga i le Atua. A o lea ua tuana'i le fitu o aso. A o le faiga malaga a Iesu ua le o mautinoa po o fea ua aga'i i ai. Ua fai sina umi o le taimi talu mai le aso na latou mua'i feiloa'i ma Iesu. Na sa'ili lava, ma sa'ili pea o Iesu, ina ia maua, e fa'aleoina ma le fa'aleo tele lona agaga fiafia ma lona loto fa'afetai.

A o se agaga lelei fo'i lea ua fa'ata'ita'i mai e le To'atasi lea mo i tatou. Na ia toe foi e vivi'i ia Iesu: na ia saili i le Atua i le vi'iga ma le faafetai. Auā ua faia e Iesu galuega sili mo ia. Ua tatau la, ma onomea, ona faafo'i le faafetai ma le faamanū i le Atua Pa'ia. A e fa'amata o tatou sa'ili fa'apena i le Atua, e pei o le To'atasi lea? To'atele ua sa'ili i le Atua ina ia fa'amalie o tatou mana'o lasi. To'atele fo'i ua sa'ili i le Atua ona ua lavelavea i ni fa'afitauli ogaoga, ona tagi lea i le Atua ina ia fesoasoani mai, ma lavea'i mai; e pei o le upu ua masani ai i tatou, "A mū loa le lima, ona tapa lea i le i'ofi." E tāua o ia taimi e tatou te saili ai i le Atua. A ia tatou iloa foi ona saili i le Atua i le leo o le vi'iga, ma le agaga o le faafetai.

Fa'auau le tala a Luka fai mai, ua "...faapa'ū faō ia i ona vae, ua faafetai mai ia te ia..." O le faapa'ū faō, o le faailoga o le ifo to'ele, ma le tu'uina atu atoa lou tagata i lē ua e fia fa'aali ai le agaga o le faafetai. E tusa ua e fai atu, "E lē o ia te a'u se ario, po o se auro. A e na o le pau le mea lea ua ia te a'u, o lo'u ola. Ou te tu'uina atu lo'u ola mo Lau Afio Iesu Keriso." Atonu ua tatau. Ua tatau ona tu'uina atu lo tatou ola atoa mo le Atua, ma Lona Finagalo. Auā o Ia lava ua na ofoina mai Lona Alo Pele e To'atasi, o le To'atasi lava lea, e togiolaina ai i tatou le tagata ua mama'i i le agasala; e ala i Lona Soifua Mamā ma le Atoatoa, o le Tama'i Mamoe na faia ai le taulaga e faamamāina ai i tatou mai a tatou agasala uma. Sa tanumia i le tu'ugamau i ni nai aso. A ua toe tu manumalo mai le oti ma le tu'ugamau, ina ia tatou ola faatasi ma Ia e lē gata i le olaga nei, a e faapena foi i le Ola faavavau.

Le Ekalesia, fai mai le fetalaiga a Iesu i le To'atasi, "E lei faamamāina ea le toatinoagafulu? A o

ifea le toaiva?" Ai se matagofie pe a tatou maua le agaga o le To'atasi lea na toe foi ia Iesu e faaleoina lona faafetai, ma vivi'i ia te Ia. Auā e tele o tulaga ua tatau ona tatou faafetaia ai le Agalelei o le Atua: o le Ekalesia sa lamatia e le fili ma ana togafiti ese'ese lē taupulea. A ua ā nei? O lea ua tatou saogalemu mai. E tatau la ona tatou si'i le viiiga i le Atua! A e 'aua le ave a tatou ma isi o le to'aiva lea na lē toe foi ia Iesu.

E fa'apena foi le atunu'u ma le malo. E tatau ona tatou lagona fa'atasi le agaga o le fa'afetai i le Atua, ona ua sologa lelei tulaga o lenei fa'ama'i oti o le Koviti 19, ma ua fa'aitiitia tagata ua afaina, pe ua maliliu ai foi, ona o le Koviti 19 o lea ua tele ina afaina ai atunu'u ma faiga malo ese'ese. E le gata i fa'ama'i o le tino, a e fa'apena fo'i ma isi ituaiga fa'ama'i sa feagai ma i tatou. A o lenei ua faamamāina e le Atua, ma ua tatou tofua maua Lana faamalologa pa'ia. I totonu foi o auaiaga ta'itasi, e ui lava o loo tutupu pea faafitauli i o tatou aiga, a ua tatou taufai lagona le faafetai i le Atua, auā e lē tu'ulafoa'iina e Ia o tatou tagata. Ia tatou tatalo pea ia saogalemu o tatou aiga uma i le alofa tausii o le Atua.

I le ma lenei, o le fa'afetai, o le tasi lea vaega tāua tele o lo tatou ola fa'ale-fa'atuatua. E pei ona fetalai Iesu, "Ina tula'i ia, ina alu; o lou fa'atuatua ua e malolo ai." O lo tatou agaga o le Fa'afetai ma le Vi'iga i le Atua e mafai ona fa'aalia e ala i a tatou faiga taulaga i tausaga ta'itasi, ma tausaga uma. Ia tatou faia le mea sili mo le Atua, auā ua la faia pea mea silisili mo i tatou o Lana fanau, ma Lana Ekalesia. Manuia le Faiga Me.

Manuia foi galuega faai'u o lenei tausaga. Ona o Iesu Keriso. Amene.

Saunia: Susuga Fuamaila Soa, Jr. FT
EFKS Waimanalo
Pulega Hawai'i Sasa'e
Matagaluega HAWAI'I

TUSI MO LE SU'EGA **ULUFALE MALUA 2022**

Feagaiga Tuai - 1 Nofoaiga Tupu.

Feagaiga Fou - Mataiao.

FAAU'UGA SU'EGA FAAI'UASO MALUA 2021

Na faatumulia le malumalu O Le Fale Iupeli i Malua i le Aso Toonai 27 Novema, i le mamalu o le Ekalesia, le Malo, o matua, aiga ma uo, i le Faau'uga o le Vasega Faai'uso 2021. Na ta'ita'i le sauniga e le afioga i le Taitaifono Komiti Malua, susuga Asotasi Gu Time FT, a o le susuga Failautusi Komiti Malua ia Leaso Tupa'i FT na faitauina le Tusi Paia (F.T: Malaki 3: 13 - 4: 6; F.Fou: Galuega 1:6-11) ma le susuga Fili Matalavea FT na saunia talosaga. O le Lauga na saunia lava e le ta'ita'i: Matua - *Malaki 4:2-3, 'A o outou o e matata'u i lo'u igoa, e alu a'e ia te outou le La o le amiotonu... 'Manatu Autu - 'Malosi i le Faatalitali.'*

O le tolaulauina o suafa o A'oa'o Faau'u ma o latou faletua, ma le tauaoina atu o latou Tusi Pasi, sa nafa ma susuga i le Pule o le Kolisi, Dr. Vaitusi Nofoaiga FS, ma le Sui Pule ia Makesi Neemia FS, a o le susuga i le Taitai o le Sauniga na ia faae'e ma faau'u, ma faia le Tatalo faapitoa mo lo latou faapaiaina. Sa auai i lenei faamoemoe le mamalu o le Laulau Fono Tele, o susuga Toeaina, Faifeau ma Faletua. Na valaaulia foi le susuga i le faifeau Pule o le Kolisi Faafaifeau Piula. A e na molimauiina foi e lana afioga i le Ao Mamalu o le Malo, le Sui Fono Sui Tofia ma la'ua masiofo, le afioga i le Tamaitai Palemia, le sui Palemia, Minisita ma Faipule o le Palemene.

I le Tala o galuega o le tausaga, na ta'ua ai e Dr. Vaitusi e 104 le aofa'i o A'oa'o a'otauina i lenei tausaga, aofia ai le to'a 6 sikolasipi mai isi Ekalesia. O le tausaga nei na amata galulue faia'oga ai susuga Esera Esera & Pauline, ma Leuelu Setu & Panorama. Ua faamavae le susuga Maafala Lima FS & Lalokava sa avea ma Pule, mo le galuega tausi nuu i Otara, o faifeau faiaoga ia Latu Latai FS & faletua mo le EFKS Apia, Apela Ah Him FS & faletua mo le galuega i Amerika, Filemoni Crawley FS & faletua mo le EFKS Te Atatu, ma Melepone Isara FS & Tupe ua filifilia e le Fono Tele 2021 e avea ma Teutupe a le Ekalesia. O A'oa'o ia Periti Tauapai ma Nili Alo, ma le faia'oga ia Dr. Seumaninoa Puaina FS, na fai i lagi le folauga a o gasolo taualumaga a le Kolisi. Ia faamaiseina pea e le Atua aiga ma Ekalesia faanoanoa.

E to'a 28 le aofa'i o le Vasega Faai'uso, e aofia ai le to'a tasi mai le Ekalesia i Tokelau, ma le to'a lua mai le Uniting Church Kiribati. E to'a tasi na maua le Tusi Pasi o le Diploma of Theology, to'a 17 le Bachelor of Theology, to'a 10 le Bachelor of Divinity with Honors. Malo le toa, malo le tau!

DIPLOMA OF THEOLOGY

A'oa'o: **Samuelu Solomona Afutiti**, 31 tausaga.
Nuu: Vailima, Tulaele.
Faletua: **Mane Afutiti**, 33 tausaga.
Nuu: Vailima, Tulaele.
Matagaluega: **APIA**.

BACHELOR OF THEOLOGY

A'oa'o: **Ailepata Ailepata Leuta**, 36 tausaga.
Nuu: Falefa, Saleimoa, Satapuala.
Faletua: **Lautele Ailepata Leuta**, 29 tausaga.
Nuu: Leulumoega Tuai, Vailele, Toamua, Falelatai, Mulivai Safata.
Matagaluega: **AANA**.

A'oa'o: **Aunese Anau**, 37 tausaga.
Nuu: Fasitoo-uta, Faleula.
Faletua: **Fiona Anau**, 36 tausaga.
Nuu: Asaga, Foailalo.
Matagaluega: **VITORIA**.

A'oa'o: **Eletise Vainuupo Palemene**, 30 tausaga.
Nuu: Moataa, Ulutogia, Vailoa Aleipata, Faleū Manono, Sapapalii.
E le'i faaipoipo. Matagaluega: **VITORIA**.

A'oa'o: **Faafetai Nepo**, 34 tausaga.
Nuu: Faatoia. E le'i faaipoipo.
Matagaluega: **KUINISELANI**.

A'oa'o: **Iafeta Iese Vaopuka**, 29 tausaga.
Nuu: Fakafo, Tokelau. E le'i faaipoipo.
Matagaluega: **FAKAOFO, EFKT**.

A'oa'o: **Ioane Samuelu**, 43 tausaga.
Nuu: Lalomanu Aleipata. E le'i faaipoipo.
Matagaluega: **LOTOFAGALEPA ALEIPATA**.

A'oa'o: **Kereveta Tiumalu**, 42 tausaga.
Nuu: Satapuala, Nuusuatia, Vaitele-uta.
Faletua: **Faanaitaua Lafaiaili Tiumalu**, 44 tausaga.
Nuu: Faatoia, Leauvaa, Falealupo.
Matagaluega: **KUISELANI I SAUTE**.

A'oa'o: **Konelio Tuiai Taumaloto**, 34 tausaga.
Nuu: Saleimoa, Saleaamua.
Faletua: **Iota Tuiai Taumaloto**, 32 tausaga.
Nuu: Letui. Matagaluega: **MALUA**

4. O LE SULU SAMOA NOVEMA 2021

A'oa'o: **Lavea'i Fonomaalii Sene**, 34 tausaga.
Nuu: EFKS Campbelltown, Foailalo, Faletagaloa,
Salua Manono. E le'i faaipoipo.
Matagaluega: **NIUSAUELESE SISIFO**.

A'oa'o: **Metusela Ioane**, 34 tausaga.
Nuu: Salelologa, Lano, Lalomanu, Ulutogia, Avao,
Faletua: **Avei Ioane Samoa**, 27 tausaga.
Nuu: Fogapoa, Pu'apu'a, Fa'ala.
Matagaluega: **FAASALELEAGA**.

A'oa'o: **Navy Luatua**, 41 tausaga.
Nuu: Saleimoa.
Faletua: **Amiaifolau Luatua**, 41 tausaga.
Matagaluega: **MALUA**.

A'oa'o: **Niutuiatua Onesemo**, 39 tausaga.
Nuu: Malaemalu, Vaitele-tai.
Faletua: **Cecilia Taefu-Onesemo**, 39 tausaga.
Matagaluega: **FALEATA**.

A'oa'o: **Paie Tapu Legalo**, 30 tausaga.
Nuu: Saleapaga, Fagalii, Fusi Saoluafata.
E le'i faaipoipo.
Matagaluega: **LOTOFAGALEPAALEIPATA**.

A'oa'o: **Penhuro Lilomaiava**, 54 tausaga.
Nuu: Falevao, Lepa, Luatuanuu.
Faletua: **Feagia'i Lilomaiava**, 52 tausaga.
Matagaluega: **KUINISELANI I SAUTE**.

A'oa'o: **Tafatolu Talia Tapaleao**, 28 tausaga.
Nuu: Toamua, Saanapu.
E le'i faaipoipo.
Matagaluega: **MANUKAU**.

A'oa'o: **Vauea Esau**.
Faletua: **Susiefaafetai Vauea**, tausaga 33.
Nuu: Auala, Tuanai, Falelima.
Matagaluega: **ITUOTANE**.

A'oa'o: **Visesio Leilua**, 38 tausaga.
Nuu: Fusi Safotulafai.
Faletua: **Faapenu Leilua**.
Nuu: Fatausi, Siufaga Falelatai.
Matagaluega: **FAASALELEAGA**.

BACHELOR OF DIVINITY
WITH HONORS

A'oa'o: **Beretia Unnang**, E le'i faaipoipo.
Matagaluega: **KIRIBATI UNITING CHURCH**.

A'oa'o: **Dominic Taeleipu**, 36 tausaga.
Nuu: EFKS Dandenong, Afega.
E le'i faaipoipo.
Matagaluega: **VITORIA**.

A'oa'o: **Isaako Junior Iose**, 35 tausaga.
Nuu: Sapunaoa, Magiagi, Vailoa Palauli.
E le'i faaipoipo.
Matagaluega: **NIUSAUELESE**.

A'oa'o: **Kapeni Matautia**, 39 tausaga.
Nuu: Magiagi, Matautu Falelatai, Paia, Samauga.
Faletua: **Renolla Matautia**, 34 tausaga.
Nuu: Apia, Falealupo, Magiagi.
Matagaluega: **FALEATA**.

A'oa'o: **Lancealotte Fasi Misa Alaimoana**, 47.
Nuu: Gagaifo Lefaga, Vaimoso, Laulii.
Faletua: **Naomi Matamu Alaimoana**, 50 tausaga.
Nuu: Magiagi, Salua Manono.
Matagaluega: **KUINISELANI**.

A'oa'o: **Loia Jr. Fiu Kolia**, 29 tausaga.
Nuu: Matautu-uta Apia, Sili, Lano, Tufutafoe, Vailele.
Faletua: **Easterakesa Kolia**, 25 tausaga.
Nuu: Vaiee, Auala, Tuanai, Vaitele.
Matagaluega: **APIA**.

A'oa'o: **Peni Manila**. 36 tausaga.
Nuu: Faga, Fa'ala Palauli, Vaitele-fou.
Faletua: **Florence Manila**, 36 tausaga.
Nuu: Tafagamanu Lefaga.
Matagaluega: **FALEATA**.

A'oa'o: **Sekuini Livigisitone Fiavaai**, 41 tausaga.
Nuu: Laulii, Moataa. E le'i faaipoipo.
Matagaluega: **MANUKAU**.

A'oa'o: **Tavita S. Reupena**, 49 tausaga.
Nuu: Aleisa, Sasina, Salani, Fagamalo.
Faletua: **Logosau Reupena**, 40 tausaga.
Nuu: Faiaai.
Matagaluega: **FALEATA**

A'oa'o: **Rev. Teratabu Takaria**, 33 tausaga.
Nuu: Kiribati.
Faletua: **Tetera Teratabu**, 34 tausaga.
Matagaluega: **KIRIBATI UNITING CHURCH**.

*"Faauta, ou te aau atu ia te outou e
pei o mamoe...pei o gata....pei o lupe"*

O LE PEROFETA MULIMULI

(O le Tala Faa-fagogo ua faa-Samoaina mai le tusi, The Last Oracle tusia e James Rollins)

4.02 afaifi.

Na faataavilivili e Penita Koloue le tupe siliva tuai i luga o lana kesi. Na ia vaavaai atu i le iila mai o le lanu siliva a o ia taumafai e tulimata'i le misiterio ua na faatula'i mai. Na toe faafoi mai le potu su'esu'e i le 'afa itulā talu ai. Na ia faitau i le lipoti auiliili na aumai faatasi ai. O le tupe sa faa-vailaau ma fana i le eletise ina ia iloilo lelei mo tulagalima, sa su'esu'e atoa lona tino laualuga ma le u'amea o gaosia ai i lalo o masini faasaienisi faapitoa, a o tapu'e le tele o ata e aofia ai ma nisi sa pu'e i masini vaai mamao. Sa faaitiitia le taavili a le tupe, ona taatia ifo lea i luga o le kesi. Ua uma ona fufulu lelei ma faamamā ma le faaeteete, ua susulu manino mai ai le ata mai anamua o loo lolomi ai. O se malumalu Eleni o loo tu i luga o ni pou Torika e ono.

I le ogatotonu o le malumalu o taatia ai se mata'itusi tele. O le E. Le mata'itusi Eleni o le Epialona.

I le isi itu o le tupe o loo i ai le fuatino o se tamaitai ma upu TIVA FAUSATIVA o loo tusia ai i lalo ifo. Mai le lipoti na iloa ai, o le tupuaga o le tupe ua lē o se mea e toe natia po o se misiterio.

A e o le a le mea - ? Na tatagi faafuase'i lana telefoni. "Lau afioga i le Faatonu Koloue, o lea ua taunuu mai le susuga i le Taitai ia Piese".

"Ua lelei tele. Faasino mai o ia i totonu iinei, Parani." Na toso atu e Penita le lipoti ia te ia a o matala le faitotoa. Na laa mai i totonu Karai, o lona lauulu uliuli o loo susū ma ua selu. Ua uma ona ia sui, aveese ona ofu sa lavatoto a e ofu lona mitiafu lanu meamata o loo matamata tetele ai le AMI i le itu i luma, faatasi ma le ofuvae uliuli ma ona se'evae galue. A o ulufale mai o ia, sa maitauina e Penita se ata lafoia i foliga o le tamalao, ma se vaaiga lē lava i ona mata lanu moana-efuefu. Na mate'ia e Penita le mafuaaga. Ua uma ona ia maua le tala mai le Ofisa o le Fuāmanua, i ana lava ia fesootaiga.

Na faasino atu e Penita Karai i lona nofoa. A o nofo ifo ia i lalo, na ia vaai atu i le tupe siliva i luga o le kesi. Na manino mai le suia o foliga i le fia iloa. Lelei. Na tulei atu e Penita le tupe ia Karai. "Lau susuga i le Taitai, ou te iloa ua e talosaga e tu'ua ou tiute mo se malologa, a e ou te mana'o e te ta'ita'iina le su'esu'ega o le mataupu leni." E le'i i ai se taumafaiga a Karai e tago i le tupe. "E mafai ona ou fesili atu muamua, lau afioga?"

Sa luelue mai le ulu o Penita.

"O le tamalao lea ua maliu. Le polōfesa."

"O Atipale Poleki."

"Na e ta'ua faapea sa aga'i mai o ia iinei. E vaai oe."

Na toe luelue le ulu o Penita. Na ia masalomia le itu o aga'i i ai fesili a Karai.

"O lona uiga sa masani Polofesa Poleki ma le Sikima? E ui ina sa matuā mautū gaioiga mo le malu puipuia ia 'aua ne'i silafia e se tasi, a e sa ia iloa lava la tatou faalapotopotoga?"

"Ioe. Pe a tuu i se isi itu."

Na manumi le muāulu o Karai. "O le a le isi itu lena?"

"O Atipale Poleki na ia faavaeina le Sikima."

Na talia e Penita sina fua itiiti o le faamalieina i le faate'ia o le tamalao. Na mana'omia e Karai sina lūlūina teisi. Na ia nofo sa'o atu i luga i lona nofoa.

Na si'i a'e i luga le lima o Penita. "Ua uma ona ou talia lau fesili, Karai. Se'i tali mai la la'u fesili. E te ta'ita'iina le su'esu'ega o le mataupu leni?"

"Ua uma ona fana e le tagata le polofesa i o'u luma; ou te mana'omia le tele o tali e pei o se isi tagata."

"Ae faapefea au... gaioioiga faa-su'esu'ega faaopoopo?"

Na faapūiti mata o Karai i le tiga. O ona foliga sa pei ua tutupu faamalō atili a o fusi mau se vaega o ia i totonu. "Ou te masalo ua e maua se tala, lau afioga."

"O lea lava. Ua taofi le saililiga a le fogavaa."

Sa to le mānava a Karai. "Ua uma ona ou tuliloaina tulimanu eseese. Ua leai se isi mea ou te mafaia. Ou te ta'utino atu le mea lena."

"A e o lena e te manatu o loo ola pea Monike?"

"Ou... ou te lē iloa."

"A e mafai ona e ola ma tauave lena mea?"

Na faafetaui e Karai lana pulato'a, e le'i 'emo ona mata. "O le a ou faasaga i ai."

Na luelue le ulu o Penita, ua faamalieina. "Ia, ta talanoa loa e uiga i le tupe leni."

Na aapa atu Karai ma aumai le tupe mai luga o le kesi. Na ia faa-feliuliua'i i ona tamatama'ilima, a o maitauina lona tino ua fou le faamamāina. "Sa mafai ona e maua ni tala e uiga i leni tupe siliva?"

"Ia, e feoloolo lava. O se tupe siliva Roma na gaosia i le seneturi lona lua. Taga'i i le ata o le tama'itai o loo i tua. O Fausativa le Matua lena, le faletua o le emeperoa Roma o Anetonino Piu. Sa avea o ia ma faatina o teineiti matuaoti, ma sa ia lagolagoina le

tele o galuega fesoasoani mo tina ma tamaitai. Sa i ai foi lona naunauta'iga faapitoa mo se faalapopotoga o perofeta fafine, mai se malumalu i Eleni."

Na tālo atu le lima o Karai ia Penita ia liliu le isi itu o le tupe. "O le malumalu lena o loo i le isi itu. Le malumalu o Telefaia."

"E pei ona i ai le Perofeta o Telefaia? Le perofeta fafine?"

"O lena tonu lava."

O le ripoti o le tupe siliva o i luga o le laulau a Penita o loo aofia ai se pepa o faamatalaga o le tala faasolopito e faasino i le Perofeta, o loo auiliili ai nei fafine latou te mimiti le asu ma ausa, e mafai ai ona maua le mana e tali ai fesili faatatau i le lumana'i. Peitai o a latou perofetaga e sili atu nai lo le ta'uina mai o manuia i le lumana'i, auā o nei fafine e telē lo latou sao i le lalolagi anamua. I totonu o le periota e tusa ma le meleniuma, o valoaga a le Perofeta na fesoasoani tele i le faasa'olotoina o le faitau afe ma afe o tagata pologa, o le totōina o le fatu o faiga malo faatemokarasi i le itu i Sisifo, ma le siitiaga i luga o le tulaga faapaiaina o le soifuaga o tagata. O nisi na latou faapea ane, o upu a nei perofeta na ogatotonugalēmū i le aveeseina o Eleni mai le olaga faapaupau maotua, aga'i atu i le tulaga pulea lelei faaonaponei.

"Ae faapefea le E lapo'a o loo i le ogatotonu o le malumalu?" Na fesili atu ai Karai. "Ou te masalo o le mata'itusi e faa-Eleni foi. O le Episalona."

"Ioe. O lena foi mea e mai le malumalu o le Perofeta. Sa i ai ni faailoga tusitusia e tasi pe lua i le malumalu: Gnothi seauton, o lona faaliliuga –"

"Ia e silafia oe," na tali atu ai Karai.

Sa luelue atu Penita. E ao ona ia manatua o Karai sa a'oa'oina lelei i filosofia faa-anamua. I le taimi na muamua faafaigaluega ai o ia e Penita mai le falepuipui i Leaveniuti, o Karai sa a'oa'o ana mataupu o le Su'esu'ega o Vailaau faapea le talitonuga faa-Tao. O le tulaga ese lea o le mafaufau o Karai na faaosofia ai Penita mai le amataga. Peitai o lena tulaga ma'ema'e na i ai ma lona tau. E le'i sologa lelei Karai faatasi ma isi tagata, e pei ona sa ia faailoa manino mai i vaiaso ua te'a. Ua manaia le maitau atu ia te ia o faamamafa le taimi nei ma le nofoaga nei.

"O lena foi e i ai le mataupu i le misiterio o le mataitusi E," na fa'aauau atu ai Penita, a o genogeno atu i le tupe siliva. "Sa taatia o vaneina i le vaega aupito ogatotonu o le malumalu."

"Ae o le a lona uiga?"

Sa faamimigi Penita. "E leai se tasi na te iloa. E oo i le au Eleni. O faia'oga o le tala faasolopito na latou saili i tua e oo i le tamā Eleni o Puluta sa na ona latou tau matemate i lona uiga. O le talitonuga taatele ua i ai i aso nei, faapea sa lua ni mataitusi sa i ai. A G ma le E, e faasino i le atua tamaitai o le lalolagi, o Gaia. O le uluai malumalu i Talefaia na fausia e tapuai ai ia Gaia."

"Ia, a e afai o le uiga ua o se misiterio tele, aiseā na faapipii ai i luga o le tupe siliva?"

Na tulei atu e Penita le lipoti ia Karai. "E mafai ona e faitau atili i ai i le lipoti lena. A o faagasolo mai aso, sa avea le E a le Perofeta o se faailoga faasino i se tapuaiga o perofetaga. O loo fa'aalia i ata ma valivaliga tuufaasolo mai auga tupulaga, aofia ai le ata a Nikolao Pousini e ta'ua o le Faau'uga, o loo tusia ai i luga o le ao o Keriso a o Ia tuuina atu ki o le lagi ia Peteru. O le mata'itusi o loo talitonuina e faailoga ai le taimi o suiga tetele, maoa'e ma ogaoga o le lalolagi, e faia e se tagata e toatasi, pe o le Perofeta o Talefaia po o Iesu o Nasareta."

Na faataatia e Karai pepa i luga o le laulau ma lūlū lona ulu. "Ae o le a le fesoataiga o nei mea uma ma le tamaloa ua maliu?" Na sii a'e e Karai i luga le tupe siliva. "Sa i ai se tāua o lena tupe? Sa talafeagai ona maliu ai se tasi?"

Sa lūlū le ulu o Penita. "E leai se tulaga faapitoa. E i ai lona tau aofai fetau lelei, a e leai se isi mea tulaga ese faasino i ai."

"A e aisea lava la –?"

Na faafelavei le valaau mai o le sipika ma faaselemutu ai lana fesili. "Lau afioga le Faatonu Koloue, faamalie ua faalavelave atu," na valaau mai ai lana lagolago. "O le ā, Parani?"

"O loo i ai se valaau faanatinati mai ia Fomai Teni mai le fale su'esu'e mo gasegase. O loo mana'o mai o ia mo se fonotaga i luga o telefoni i le taimi nei lava."

"Ua lelei. Tuu ane i le laina numera tasi."

Na tula'i Karai o le a alu, a e tālo atu Penita e nofo i lalo, ona taavili lea o lona nofoa ua faasaga i tua. O lona ofisa sa tanumia i lalo o le maota, e leai ni faamalama, peitai sa i ai televise tetele e tolu na faapipii i le puipui o le potu. O ana faamalama tumaoti ia e iloa ai le lalolagi. O loo pogisā i le taimi nei, a e o le tasi i le itu tauagavale na 'emo loa ma ola mai. Ua silaloa atu Penita i totonu o le potu o su'esu'ega mo tagata gasegase/maliliu. i ona tua atu o tu mai ai Foma'i Teni. O le faauluuluga o le Vaega Su'esu'e

O LE PEROFETA MULIMULI....

mo Sikima e onosefulu tausaga, sa la'ei mai i toniga mo ta'otoga, ma se pulou palasitika kilia e punitia ai foliga, o loo faamaulu faasipa i lona ulu. O ona tua atu o loo taatia mai ai se tasi o vaega faapitoa o le potu su'esu'e: o le fola e simā ma faamaufaailoga, o fua ma mita faatulaga faasolosolo, ma le ogatotonu o loo i ai se laulau o taoto ai se tino maliu, o loo ufiufi faalelei i le 'ie.

O Polofesa Atipale Poleki.

Sa tele ni taumafaiga e aumai ai lona tino maliu i Sikima mai le fale maliu o le aai, a o Malakoma Teni o se foma'i lauiloa ma fa'aalolaogia.

Peita'i mai le vaaiga i foliga o ona laugutu, na iloa ai o loo i ai se mea o loo faalētonu.

“O le a le mea ua tupu, Malakoma?”

“Sa ou tago fā'asu le potu su'esu'e.”

E le'i logo lelei ia Penita le tala lea. “O se faafitauli o se ma'i e pipisi?”

“E leai, a e mautinoa e telē le faalētonu o lona aafiaga. Se'i fa'aali atu ia te oe.” Na alu ese o ia mai le ata o le televise, a o lona leo sa lagona lelei pea. “Mai ulua'i su'esu'ega o le tino, sa ou masalosalo lava. Na ou maua vaega o laulu ua misi, o nifo ua to'ulu, ma vaega ua mu o le pa'u o lona tino. Pe ana faapea e lē fanaina o ia, ou te manatu e maliu lava o ia i nai aso.”

“O le a le uiga o lau tala, Malakoma?” O le fesili atu lea a Penita.

E pei lava na te le'i lagona mai. Na toe alu ane le fomai i luga o le ata, ma ua suia lona la'ei i se talieleele mamafa atu. Sa ia taulimaina se masini, e pipii ai se uaea uliuli.

Na tu i luga Karai ma faalatalata atili atu i le televise. Na faasolosolo e le fomai le uaea i luga a'e o le tino maliu. Na ola faafuase'i le masini ma lona pa'ō malosi pei o le tātā o se uati. Na faasaga sa'o mai foliga o le foma'i i le televise.

“O le tino lenei o loo faaeletise, e uilā faa-leitiō.”

Setema 5, 5.25 afiafi

Uosigitone, Matagaluga Kolomopia.

Ua toe oo ane i fafo ma lona mitiafu vela, ona savalivali atu lea o Karai i le ala savali i lumafale o le Olo o Simifisone. O le Maota talaloa o le atunuu o loo faasolosolo i le itu agavale, ua tele ina tuufua ona o le vela o le tau. I tua ane o Karai o loo pipii ai pea lipine sa toso e faailoga ma puipua ai le nofoaga

na faia ai le fasiotiga tagata i le aoauli. Ua mae'a su'esu'ega a le vaega faafoma'i, a o loo tapuni pea le nofoaga, o loo vaavaaia e se tasi o leoleo o le Itumalo Kolomopia.

Na savali Karai i sasa'e i luga o le Ala Sefesone. Sa faamalumalu ifo ia te ia se leoleo totino laulauā, sa ia taumafai malosi e 'aua le amanaiaina. E le'i mana'o o ia i se puipuiga, ae maise lenei tamaloa leoleo sikulakī. Na tago Karai i le faaleotele leo i lona fa'a'i ma memumemu i ai, “O lea ua ou maua se ta'iala.” Sa oso faafuase'i mai le gogolo o le tali i lana uaealesi faapipii i le taliga. Na faapi'o lona ulu, ma toe faatulaga sa'o le uaealesi. “Toe fai mai,” sa ia musumusu atu ai.

“E mafai ona e mulimuli ai i lona ala ua maua?” na fesili mai ai Penita Koloue.

“O lea lava.. a e ou te lē iloa po o le a le umi. E fai sina vaivai o faitauga.” Ua uma ona faailoa e Karai le faasologa o ana gaioiga o le taimi nei. Na ia toe iloilo le masini o loo 'u'u i lona lima, o se mea e ta'u mai ai faailoga o nofoaga ma mea faa-eletise. O lona fa'agā'au o loo faatumu i se kesi(gas) faapitoa e mafai ai ona pu'e ma ta'u mai faamaoniga o se tino o loo faaeletise, ae maise pe afai e ki faatatau i le malosi e 90 isotope sa maua i le tino o Poleki. Sa faamoemoe Karai e i ai sina faailoilo e totoe o taatia ai i le mea sa i ai le tino o Poleki. Ma e pei lava o loo sologa manuia.

“Fai le mea e gata ai lou iloa, Karai. Soo se faamatalaga e maua mai faasino i mea sa i ai le polōfesa e tāua tele. Ua uma ona ou faafesoota'i lona afafine, a e le'i mafai ona ou maua o ia.”

“O le a ou tulituliloa le faasinoga lenei i le mea e gata ai.” Sa fa'aauau ifo Karai i le ala savali, ma mata'itū pea lana masini. “O le a ou lipoti atu pe a maua soo se mea.”

Na tapē e Karai lana faaleotele leo ma savali atu pea i autafa o le maota talaloa. Na taunuu atu i le isi 'afa poloka, a e faafuase'i ona mate le faailoilo i lana masini. Na upuvale malie o ia a o tu faafuase'i, toe solomuli i tua, ma taia ai i le leoleo sikulakī o loo faamalumalu ia te ia.

“Se vaai faalelei, Piese,” na tomumu ai le tamaloa. “Faato'ā uma na polesi seevae nei.”

Na tilotilo ane Karai i luga o lona tau'au i le mauga masomasoa o loo tu mai i ona tua...

(fa'auau Sulu Samoa Tesema 2021)

O A TATOU MEA'AI TATAU MA LE ASO

Penina mai Oneone

“³e foa’iina atu ia i latou le matagofie e sui a’i le lefulefu.” Isa. 61.

E lē ma’imauina le taimi o le lalolagi ina ia faafiafia ia te oe. Se’i loga e te taliaina lena mafaufauga, ona faato’ā amata lea ona e aga’i i luma. O le olaga lena e masani ona lē sologa e tusa ona e mana’o ai. Na tusi atu Paulo, “²⁴a a’u alu malaga i Sepania, ou te faamoemoe ou te asiasi atu ia te outou i la’u malaga.” Roma 15. Peita’i e foliga mai e le’i oo lava o ia i Sepania; a e na o lona taunu’u i se tasi o falepuipui e sili ona mata’utia i Europa. A e o iina na ia tusia mai ai ana Tusi faa-aposetolo.

O ou faalētonu e ono avea ma tofiga a le Atua. O la le Tusi Paia, “⁹E filifili i le loto o le tagata lona ala; a o le Alii na te faatonuina le mea e ui ai o ia.” Faata. 16. E te lē fiafia o loo pulea e Ia lou olaga? Faitalia le au fai mafaufauga o le lalolagi ma a latou finauga pe aiseā e faapea ai ona tutupu mea i le lalolagi; tau lava ina e taula’i lau vaai pe faapefea ona e ola ai. Pe afai e te soifua ia aulia le selau tausaga, o le ā se manaia ia te oe pe afai na o le ita ma le faanoanoa, e aunoa ma sou fiafia o maua ai? A e o le ā se lelei o nisi aso faaopopo, pe afai na o loo faamāumāuina ma faalēaogāina aso o i ai nei?

E te manatua le auala e gaosia ai le penina i totonu o le atigi figota faisua? Pe afai e ulu atu se nutigā momoi oneone i totonu o le atigi o le faisua, e matuitui ma faatigā ia te ia; peita’i na te lē te’ena pe taumafai e tete’e ese le faafitauli, a e na te afifi lelei ma tā’ai ai le nutigā momoi oneone i ona ‘āpulumulu ma ‘alu matagofie, se’ia oo ina aliali mai, ua fausia ma tupu ai le penina. Fai mai se tasi tusitala, ‘O se tala manaia lena lona a’oa’oga, auā e maoa’e le mea e fai e le faisua i sina nutigā momoi oneone. E anoanoa’i mea lelei tatou te gafatia, pe ana tatou amata mai nisi o mea faafatiātama’i e matuitui ai o tatou pa’u.’

O loo galue le Atua i mea uma o loo e faia i lena aso, mo lou manuia ma le viiga o Lona suafa. Pau lava le mea e te faia o lou talitonu ia te Ia. Pe afai e faapea ona e faia, o le a Ia avatu le matagofie ia te oe e sui ai le efuefu. E fananau ma tutupu penina mai nutiga oneone, ina ua liliu e le Atua e ala i lou faatuatua, lou loto faamagalalo ma le tausisi i le alofa ma le filemu.

O le Fofō a le Atua mo le Atuatuva

(i) *“Ina tu ia i luga, ina ‘ai, auā e mamao le ala.” 1 Tupu 19.*

Pe afai o loo e fetaia’i ma gasegase, to’atugā ma faafitauli ua aafia ai lou tino, mafaufau ma le loto i le atuatuva ma faanoanoaga, e tāua lou saili fesoasoani i se foma’i faapitoa o le tino ma le mafaufau. Peita’i e atamai foi le Atua ma e i ai ana fofō. *Ia tausi lou soifua lelei i le tino.* Sa vaivai Elia, ona ia faaloloa ifo lea i lalo o le laau o le ratami ma moe ai. “⁵Faauta mai, o le agelu ua pa’i mai ia te ia, ma fai mai ia te ia, Ina tu ia i luga, ina ‘ai. ‘Ona vaai atu lea o ia, faauta, sa i ona ulu le potoi areto ua tunu i maa aasa, ma le ipu vai. Ona ‘ai lea o ia ma inu; ona toe taoto lea o ia.” Ona toe sau faalua lea o le agelu ma fai ane, “⁷Ina tu ia i luga, ina ‘ai, auā e mamao le ala.” Ona ia ‘ai lea ma inu ma maua le malosi fou a ala i taumafa.

Atonu e oo mai lou vaivai ona o se galuega lelei, ma e tatalo faasoloatoa se’ia oo ina lanu moana ou foliga, peita’i e leai se fesoasoani ia te oe se’i vaganā ua e koloni ma atamai e tausi lelei mana’oga o lou tino. O le ulua’i togafiti a le Atua mo le faafitauli o lana auaua o Elia, o le suia lea o lana mea taumafa, ma le lava o lana mālōlō. O le lava o le mālōlō i le po, ma se taimi o le ao, o sina mapu ane teisi i se tafaoga, e fesoasoani tele i suiga o lagona ma fo’ia ai mafatiaga. Ia e atamai ma faautauta; pe a oo mai le vaivai o le tino ma mātūtū le mafaufau, o le a faigofie ona osofa’ia oe e le fili ma ana mailei. Ia silasila foi, e le’i ‘otegia e le Atua lana perofeta o Elia pe fai atu, ‘O oe le pala’ ai! O le a lau mea o fai iinei i le toafa?’ E leai, ae sa Ia toe faafoisia lona malosi i le tino.

Ma o le laasaga amata lena. Pe afai la ua faapulou oe e le faavaivai ma faanoanoaga, o le sitepu muamua aga’i i le toe faafoisia o le malosi, o le silasila ane lea i lou soifua maloloina. E a’afia ai le suia o mea taumafa ina ia paleni ma saogalemu i faama’i, faaitiitia po o le matuā lafoa’i le taumafa tapa’a ma le ‘ava malosi, ia lava le moe ma tele faamalositino. E tele se sao o lou soifua maloloina lelei i ou lagona ma mafaufauga. Pe mafai ona faamaloloina oe e le Atua e ala i le tali mai i au tatalo? Ioe (Iakopo 5:14). Peita’i e finagalo o Ia ina ia tatou fa’aaogā lo tatou faatuatua ma le a’oa’oia lelei, o le faatuatua atamai! Ina o faatasi le tatalo, ma le poto e fuafua le ola o aso taitasi.

(ii). **“*Faauta foi, ua oo mai ia te ia le afioga a le Alii, ua faapea mai ia te ia, Elia e, se a lau mea e fai iina?*”** 1 Tupu 19.

Ia ta'u i le Atua ou popolega. Ina ua uma ona toe faafoisia lona malosi e ala i taumafa tatau ma le lava o lana moe, ona toe malaga lea o Elia mo le fasefulu aso. Ona ia ulu atu lea i le ana ma malolo ai i le po. O le taeao na fesili atu ai le Alii ia te ia, “*Se a lau mea e fai iina?*” Ona tali atu lea o ia, “*Ua ou matuā maelegā a'u ona o le Alii le Atua o 'au, auā ua tu'ua e le fanauga a Isaraelu lau feagaiga, ua latou soloia i lalo ou fata faitalaga, ua fasiotia foi e i latou au perofeta i le pelu, ua toe na o a'u lava; ua latou fia fasioti foi ia te a'u.*” 1 Tupu 19. Na sasa'a uma atu e Elia ona atualuga, ma sa tuu avanoa le Atua se'i masa'a uma mai. E le'i faate'ia o Ia i le faaseā a lana auuana.

O nisi taimi e fesoasoani tele le faasoia atu o u mafatiaga i se uo e te talitonuina. O se auala maloloina lelei, o se faamamā e tafi ese ai le tele o le gasu sa lafo ifo ma faaputu i totonu o loo avea ma pogai o mafatiaga. Ma o Elia le tagata sa faula'i ai gaogaosā na tului ifo i totonu o lona loto. Silasila foi i ona lagona. Sa pala'ai. Ona lagona lea o le ita, sosoo ai lona faavaivai ma lagona o le ta'usalaina. ‘*Ua ou fiu..ua ou musu..ua leai so'u lelei, ua sili lo'u leaga nai lo o'u augatamā na muamua (f.4).*’ Ua lagona le tuulafoa'iina e nofo toatasi ua oo ina fememea'i; ua fefe ma popole.

Pe afai e tuufaatasi uma nei lagona eseese, ona matala lautele lea o le faitoto'a o le atuatuvalet! O le ala lea ua tu'ufau ai e le Atua ia Elia e fofola uma atu i fafo ona tiga. Peisea'i ua faapea atu o Ia, ‘*Elia, o le a le mea o loo e mafatia ai? O le a le faafitauli o loo ia fasia oe?*’ ma sa faapea foi ona faasoia atu e Elia ona lagona uma. O le mea lea pe afai e maua oe i lagona o le atuatuvalet, ia tu'u uma ma ta'utino uma i le Atua mea o loo mamafa i lou loto e ala i le tatalo. Ua fetalai mai Iesu, ²⁸“*Ia outou o mai ia te a'u, o outou uma o e tigaina ma mafatia i avega, o a'u foi e malolo ai outou.*” Mata.11.

(iii). **“*11 Ina alu ia oe i fafo, ma e tu i le mauga i luma o le Alii.*”**

Ia tulituliloa se malamalama'aga fou o le auai o le Atua i lou olaga. O le laasaga lona tolu na faia e le Atua i la la'ua fe'umiaiga ma faafitauli o Elia, o Lona fai atu lea ia alu i fafo ma tu i luma o le Atua. ¹¹“*Faauta mai, ua afio ane le Alii; o le matagi*

tetele foi ma le malosi ua lepetia ai mauga, ma momomo ai papa i luma o le Alii; e le'i i ai le Alii i le matagi; ua mulimuli i le matagi o le mafui'e; e le'i i ai le Alii i le mafui'e; ¹²e mulimuli i le mafui'e o le afi; e le'i i ai le Alii i le afi; e mulimuli i le afi o le leo filemu ma le itiiti. ¹³Ua faalogo ai Elia ona...alu i fafo, ma tu i le gutu o le ana;”

O le aso lea na fai ai le fa'aaliga mataina a le Atua i le matagi, le mafui'e ma le afi. Peita'i e le'i fetalai o Ia ia Elia i nei uiga malolosi o le natura. O le mea na ia tosina atu le gaua'i o Elia, o le leo filemu ma le itiiti – o sina musumusu mālie. E masani ona fetalai mai le Atua ia i tatou i le filemu ma le sālō – a e lē o le o faatinoga ofoofogia o afi mata'utia e iloa ai le malosi po o le paoa. Ua tusa lava lea ma lona musumusu atu, “*Elia, o lenei lava ou te i ai i ou tafatafa.*”

O le mea lea afai o loo e fememea'i ma atuatuvalet, ia tago i lau Tusi Paia ma e alu i se nofoaga filemu ma le to'amalie. Ia e nofo lelei i lalo ma faitau Afioga paia a le Atua ma mafuta faatasi ma Ia. Tau ina faataga ma faa-avanoa o Ia e alofa ia te oe ma fetalai atu ia te oe. Ia tuu ia te Ia e faataunuu ou mana'o ma ia e lagonaina Lona faatasi mai. E leai se isi auala e teena ai vaivaiga e sili atu nai lo le fesoota'i, mafuta ma feumia'i ma le Atua. O le uiga lena o ana Afioga pe a fetalai atu o Ia, ¹⁰“*Ina soia, ma ia outou iloa o a'u lava le Atua*” Sala.46.

(iv). **“*15 Ona fetalai mai lea o le Alii ia te ia, Ina alu ia oe, ma toe foi i lou ala i le vao o Tamaseko.*”**

Ia faataga le Atua na te avatu se faasinoga fou mo oe. Na faatonu e le Atua Elia ina ia alu i le vao o Tamaseko ma faau'u se tupu fou faapea ma se perofeta fou e sui tulaga ia te ia (f.15-17). Inisi upu, na Ia avatu ia Elia se faasinoga fou. Ia taumafai e fo'ia le fa'aalu o le tele o le taimi i le mafaufau faanoanoa i ou mafatiaga ma faafitauli o i ai. Ia taumafai e aveese lau vaai ia te oe lava, a e amata ona silasila atu i mana'oga o isi tagata. Ia e a'afia i o latou olaga e ala i se tala'iga po o se galuega faamisiona o loo e avatu ai se fesoasoani, ma o loo avatu ai e le Atua faamanuiaga e ala atu ia te oe.

Pe afai e te faamamafa ma fai pea lava pea le vaai ifo ia te oe, o le a e faavaivaia oe. O loo fai mai le Tusi Paia, ⁴“*Aua nei taitasi ma vaavaai i ana lava mea, a ia taitasi ma vaavaai i mea a isi.*” Fili.2. Atonu o le a e faapea ane, ‘*A o lea ua ou faiaina, ua ou lē toe aogā, ua toilalo popo ma ua lagona le lē fiafia. E mautinoa foi ua lē fiafia le Atua ia te a'u.*’

Faato'ā tupu le lē fiafia ina ua faamoemoe se isi tagata e te faia se mea e ese mai, nai le mea e tatau ona e faia. Na silafia e Iesu e i ai le taimi e faafiti ai Peteru ia te Ia, a e na Ia valaauina lava o ia. Aisea? Auā sa Ia silafia lelei foi o le a'oa'oina Peteru, ma o le a tupu lona malosi faalefaatuatua i mea e tutupu i lona olaga, ma na faia ai nisi mea tetele e sili atu. E finagalo le Atua e avatu ia te oe se faasinoga fou, se faamoemoe fou ma se itulau fou. E le'i mae'a Lona faamoemoe mo Ana feau ia te oe. Mata sa e faalētonu muamua pe faalua foi, a e lē afaina lena, o loo Ia silafia o oe ua na o se efuefu ma se 'ele. Pe afai e te mana'o i ai, ma tuu le avanoa ia te Ia, e mafai e le Atua ona Ia toe si'i a'e oe i luga ma fesoasoani i lou toe amata.

O sina mea sesē e tasi – pe faa-selau – e lē aveā lea e faalēaogā uma ai lou soifuaga atoa. O le aso lenei, e finagalo le Atua e siitia a'e oe mai ou mafatiaga. E mafai ona Ia fesoasoani atu, e mafai ona Ia suia oe. 'Aua le ma'imauina lou olaga manaia le faataugā solo e ou lagona. O ou lagona e mafai ona afaina ona o ou mafauauga; i le fesoasoani mai o le Atua, e mafai ona e suia pe faapefea ona e mafauafau, ma mea e te mafauafau i ai!

E FAIA E LE ATUA, A E LĒ O OE

“³⁴A faapefea le mea nei?” (E faapefea ona tupu lenei mea?) Luka 1.

O loo faamauina e Luka le tala i le asiasiga a le agelu o Kaperielu ia Maria le taupou Nasareta Kalilaia, ma folafola i ai le mea o le a faia e le Atua ia te ia – o le a to o ia ma na fanaua se tama tane. Ona fesili atu lea o Maria, pe faapefea ona tupu lea mea, auā o ia o loo taupou, na te le'i iloa se tane, e le'i faaipoipo. Ona tali ane lea o le agelu, *“³⁵E afio ifo le Agaga Paia i luga ia te oe.”* E tele taimi ua fetalai mai ai le Atua ia te oe, i mea e tele o loo Ia fia faia, a e o loo e vaai ifo pea ia te oe ma le tulaga o loo e i ai, ma faapea ane, *E faapefea ona fai lea mea? E mafai faapefea ona tupu lea mea?* E te faapea ifo, E leai so'u a'oa'oina lelei i lea mataupu ma lea matātā, e leai ni a'u puna'oa, leai se agavaa, leai nisi e fesoota'i i ai. Ma e mautinoa ou te lē mafaia ona fai toatasi na o a'u. Pe afai e te manatunatu pe faapefea ona faatupu e le Atua ia mea, ia e manatua lelei na te faataunuina lava! E leai se isi e ese mai nai lo Ia na te maua le viiga. E faapefea ona tupu?

“E afio ifo le Agaga Paia i luga ia te oe, e faamalumalu ifo foi ia te oe le mana o le Silisili ese.” E pei ona faatupu e le Agaga Paia le to a Maria, e faapea foi ona mafai faigofie e le Agaga Paia ona faatupu i totonu ia te oe le faautautaga mamao ma le tofa loloto, e maua ai mafauauga potu ma le talenia e faamaite ai mea fou, faasino oe i tagata talafeagai mo fesootaiga, ma faaosofia oe i le malosi e fai ai le galuega. Sa i ai le fuafuaga faapitoa a le Atua mo Maria, e faapena foi ona i ai le feau faapitoa mo oe. E te lē mafai ona e vaai nei i le lumana'i, e te lē iloa uma foi faamanuiaga a le Atua o loo teu mo oe. Peitai e i ai lana fuafuaga mo lou ola, ma e te talisapaia ou manuia i le taimi e tatau ai.

Ina ua uma le poloaiga a le agelu ia Maria, ona fai atu lea o le taupou, *“³⁸Ia faia ia te a'u e tusa ma lau fetalaiaga.”* 'Aua le faia e tusa ma ou vaivaiga, ma le tulaga o loo e i ai, i lou faasinomaga ma ou aga fesoota'i, o ou lagona, o ou agavaa, o lou tamaoiga ma mea ua talafeagai i lou manatu. A e ia tusa ma le finagalo o le Atua. Pe sa faigofie ia Maria lona fai atu, pe talitonu i nei mea uma? E leai! Na fai e Maria se filifiliga ma se faai'uga e sili ona mata'utia le lamatia ai o lona ola. O le ma'i to a e le'i faaipoipo i totonu o le sosaiete, i le nuu ma le lotu, e fetai'a'i ma puapuagā ogaoga lona tuatuaiga i na aso. Peita'i na tuu atu atoa e Maria lona loto ma lona ola ma le faatuatua i le Atua – ma o le i'uga na oo i ai, o vavega tetele, ma le faaolaina o le lalolagi atoa. Ma e mafai foi e le Atua ona fai faapea ia te oe.

A o tatou vaavaai atu i le oo mai o le Kerisimasi i lena masina o muamua, ia tatou faatalitali ma le naunauta'i i le valaau mai o le Atua, pe se a se mea o finagalo ai o Ia ia te oe ma a'u. Ia faatali mo le auina ifo o Lona Agaga Paia i luga o i tatou, ma le faamalumalu ifo o le mana o le Silisili ese, pei ona sa faia ia Maria. E le gata i luga o i tatou ta'ito'atasi, a o luga foi o tatou aiga-o tatou o matua ma le fanau, po o luga foi o le aiga potopoto; o luga o lou nuu, lau vaega faaupufai ma lau faigamalo, lau Aulotu po o luga o lau Ekalesia Aoao ma lou atunuu atoa. Ina ia 'aua tatou te fesili pe faapefea ona fai, a e ia tali atu ma le faatuatua e pei ona faia e le taupou Nasareta. Ia 'aua foi ne'i augofie, ona o mea a faia e manuia faapito ai na o lou lotoifale, a e ia sili ona loto atu e auauna ma tautua, ina ia iloa e faaola ma faamanuia ai isi tagata ma le lalolagi atoa.

Ia manuia le faataliga o le oo mai o le Kerisimasi, ma le faataliga o le valaau mai o le agelu ia Kaperielu.

FOA’IA LE EFKS LAULII

O le tausaga 2005 na amata galulue ai le susuga Pita Toleafoa FS ma le faletua ia Emi i le EFKS Laulii. E le’i pine a e amata loa e le Mafutaga Tina, i le vaega o le Itupa o Tamaitai, ona latou fai mea alofa i le au matutua o le Ekalesia ma le nuu, i le afio o le Sa’o ma ona Alo, faapea le Matua ma Salevalasi ma le mamalu ia Tuisamau ma Ituala e fia. O se galuega alofa mo tamā ma tinā matutua ma i latou e faata’otolia i gasegase i totonu o le afioaga; sa faia i masina taitasi ma taualuga ai i mea alofa o le Kerisimasi i le faai’uga o le tausaga. Mulimuli ane ona talatala atu lea i tua ma fafo atu o le nuu lenei galuega agalelei, e aofia ai Mapuifagalele le nofoaga e tausi ai matua matutua. Sa amata lenei faiga mea alofa i taumafa, o fua o faaeleleaga, o u’u manogi, o la’ei ma isi oloa talafeagai i tausaga taitasi.

O lenei tausaga, i le Aso Toonai 16 Oketopa, sa faapea foi ona asiasi atu ai le susuga Faafeagaiga ma le Itupa o Tama’ita’i i Mapuifagalele e tau’a’ao atu la latou mea alofa. Peita’i ua fai le suiga o lenei foa’i - ua lē o taumafa ma oloa, a e o le tinoitupe e \$2,000. O le faatofalaiga lea i le Faafeagaiga ma le Ekalesia, ina ua molimauina, le maumau o taumafa i le vave ona pula pe pala a e le’i fa’aaogaina. O le ala lea ua manatu ai e sili le tauaao atu o le tinoitupe i o latou aao e faasoasoa lelei ai.

Sa talia lelei mai lenei mea alofa e Tamaitai Taupou Sa, le au faigaluega ae maise o le mamalu maualuga o tamā ma tinā matutua. Sa saunoa se tasi o tamā e fai mo latou sui e faaleo le faamalo ma le faafetai, ma momoli faamanuiaga ia alofa le Atua toe tauia lenei galuega alofa a le EFKS Laulii. O le molimau a le susuga a le faafeagaiga, e leai se tasi e faapitoa mai lo latou Aulotu po o le afioaga o tausia ai i Mapuifagalele, a o le galuega lava ia a le itutino o le Ekalesia ua faasafua mo soo se matua tausi. O le Itupa o Tamaitai o le vaega o le Mafutaga Tina e faauluulu i le Tina o le Galuega, a e faapito le taulamua ai o taupou o le afioaga, le mamalu ia Sapoto ma Gese, ma tamaitai uma o le Ekalesia. Ua lē faagaloina foi e aiga o le nuu lenei tautua, pe a maliliu nai o latou matua tausi. Ua fetai tonu lenei foai ma le manatu autū o lea aso, ***Faamatalaga ma Faatinoga*** - le faatinoga o le alofa lē faatuā’oia o le Alii o Iesu, na faamaloloina ai Patimaio. Ia faamanuia le Atua, ma ia tumau Lona viiga e faavavau.

FOA’IA SMT MO KFM

O le Aso 9 Novema 2021 na tau’a’oia ai e le Komiti o Malua e ala i le Sosaiete Malua Tuai (SMT) le mea alofa mo le Kolisi Faafaifeau Malua (KFM). O lenei foa’i e ala i masini ma meafale e faatotogaina ai le Faletusi a le Kolisi:

(i) O le masini fai kopi, e lanu ata ma soo se tusiga e lolomi ai. O se ituaiga o masini e fou, ma atonu na o le Kolisi Malua ua i ai; e faatonutonu mai lava i le ofisa o le kamupani lona fa’aaogaina, ma e iloa lelei mai lava se faaletonu ma auina mai loa le fesoasoani. O le a lolomi ai le Maluapapa ma isi tusi a le Kolisi. O lona tau e \$29,353.27, aofia ai lona tausiga ma le faaleleia.

(ii) O nofoa faataavalevale fou e 50, o le tau e \$14,730. Pe afai e faaleagaina se tasi po o nisi, o le a mafai ona toe suia mai aunoa ma se isi tau faaopoopo.

(iii) O ‘ea malulu e 2, o le tau e \$5,500. O loo i ai foi le feagaiga e faaleleia ai aunoa ma se tau mo nai tausaga.

(iv) O le tau aofa’i o lenei foa’i e \$49,583.27.

O le Taitaifono Komiti Au Toeaina, o le Peresetene foi lea o le Sosaiete Malua Tuai, susuga Asotasi Time FT, na ‘o’oti le lipine ma ta’ita’i le sauniga lotu e ofoina atu ai nei mea alofa. Na ia ta’ua ua leva ona saili le tofa a le Sosaiete mo lenei faamoemoe, a e sa faatalitali pea mo le taimi talafeagai, o le faatali lava lea i le Alii e maua mai ai le tali, e pei o la le perofeta o Sapakuka, *“O le Atua le Alii, o lo’u malosi ia, na te faia o’u vae e pei o le aila, o ia foi ou te savali ai i a’u mea maualuluga.”* 3:19. O le susuga i le Pule o le Kolisi, Dr. Vaitusi Nofoaiga FS na ia talia le foa’i ma momoli le faafetai a le Kolisi, a o molimauina e le mamalu o Faia’oga ma nisi o A’oa’o o le laumua. Na ta’ua e le alii foma’i pule, e le o le ulua’i taimi lenei ua faia ai e le SMT se galuega lelei, auā o loo i ai foi le Maa Faamanatu o le 150 tausaga o le Kolisi Malua, faapea le Maota mo A’oa’o Nofa Toatasi (Mission Center), o nisi o galuega/foai na faia e le Sosaiete mo le Kolisi Faafaifeau e pele i loto, ma o loo talosia e le Ekalesia aoao. O le Failautusi o le Sosaiete le susuga Tunupopo Patu FS, ma lona Teutupe le susuga Esera Auatama Esera FS. O le alatupe maua autu a le Sosaiete, o saofaga faaletausaga a sui auai uma - susuga Toeaina, Faifeau ma A’oa’o sa a’otauina i totonu o Malua. Ia faamanuia le Atua i le foa’i ma ia te Ia le viiga.

OSIFEAGAIGAALAFUA

O le Aso Faraile, 5 Novema 2021 na osi ai le feagaiga a le EFKS Alafua ma lo latou faifeau, susuga Faisiota Autagavaia FS ma le faletua ia Lielie Tu'u'au Sao F. Autagavaia. O le sauniga mamalu na ta'ita'i e le susuga Misipalauni Faatau FT, le Toeaina o le Pulega Faleata Sasa'e a o le KMTA Matagaluega Faleata. O susuga Amosa Reupena FS (EFKS Vaimoso) na saunia le lauga faamafanafana mo le faifeau ma le faletua, a o Apisaloma Ta'eleipu FS (EFKS Aleisa Sasa'e) na lauga faala'ei'au mo le Aulotu. O le susuga Peteru Seiuli FS (Sui Faatonu A'oa'oga Kerisiano) na saunoa e fai ma sui o le Ekalesia e molimau i la latou faiga filifiliga, sa fai faalagolago i le faasinoga a le Agaga o le Atua, ma i'u ai le faatofala'iga a le Aulotu i le faifeau ma le faletua e pei ona i ai lenei aso. Sa faapea foi ona molimau le faifeau ia Faisiota e tusa ma la'ua tali i le valaau. E 12 tausaga o galue o ia o se faia'oga i Kolisi a le Ekalesia, ma auauna lagolago i le EFKS Vailoa, a o faatali se valaau mo le galuega tausii nuu, o le autū lea sa a'otauina ai i Malua. Lenei ua valaau mai le Atua e ala i le Ekalesia i Alafua, ua lagona le loto maulalo a o le agaga faafetai ona ua tau lau o le faamoemoe. Sa faaleo foi lo la'ua faafetai i e na tofua sao i le faafaileleina ma ati a'e le soifua faaleagaga - le Pule ma Faia'oga i le Kolisi Faafaife'au Malua, le susuga i le Failautusi Komiti Au Toeaina, Leaso Tupa'i FT ma le Faletua ia Faafetai, susuga Utufua Naseri FT & Taioopo, susuga Siaoisi Leleimalefaga FS (ua maliu) ma le tina ia Pele.

Sa faatumulia le sauniga i le paia o aiga na lua, o uo ma le vasega a le faifeau ma le faletua, le aufaigaluega a le Pulega ma le Matagaluega Faleata, ae maise le EFKS Alafua. O le susuga Faisiota na i'u mai Malua i le 2009; faia'oga i le Kolisi Vaisigano 2010-11, Kolisi Nuuausala 2012-15, Kolisi Tuasivi 2016-2021. O se lupe faalele a le afioaga ma le EFKS Vailoa Palauli, a o le faletua ia Lielie Tu'u'au Sao o se taulaga soifua a le afioaga ma le EFKS Ga'utavai, o le Pulega Palauli. Ua avea nei i la'ua ma faifeau lona lua a le EFKS Alafua, ina ua malolo penisione le Toeaina ia Tavita Anesone FT ma Lupe, o ulua'i faifeau a lea Ekalesia. Sa tauluga le sauniga i le Sakarameta o le Talisuga Paia, ona alo ane lea i le taumafataga fiafia ma fa'aalologa mauaululuga, faapea fesaga'iga masani a le Aulotu ma aiganalua. Ia faamanuia le Atua i le feagai ai ma le galuega, ma i'u atu mea uma i le viiga o Lona suafa mamalu.

O AU AFIOGA O LE SULU...

(Mafaufauga Faaleagaga i le Tusi Faitau Aso)

Aso Sa, 14 Novema 2021

Ia Mafaufau i Tou Ala

Tusi Faitau: Hakai 1.

“O lenei, o loo faapea ona fetalai mai o le Alii o 'au, Ia outou mafaufau i o outou ala.”

Na toe a'e le tafeaga a le nuu o le Atua mai Papelonia i le 538 TLM ma latou amata le faavae o le toe fausia o le malumalu i Ierusalem. Peitai na toe taofia le galuega ona o le tele o nisi mafuaaga. E le'i toe tagofia le galuega se'ia oo i le 520 TLM ina ua tula'i mai perofeta e to'a lua, o Hakai ma Sakaria, na la'ua faaosofia tagata e faa'uma le galuega na latou amata. O ulua'i feau e lua a Hakai o loo faamauina i le mataupu muamua. Na ia tautala atu fai ma sui o le Atua, e lu'i le nuu ina ia mafaufau i o latou ala pe na faapefea. O le tali na aumai e lē lelei: sa taatia le malumalu o se tafuna'i a o pisi tagata e faamatagofie o latou fale. Na latou manatu e sili atu le faamuamua o latou aiga, nai lo le maota o le Atua. Ma na latou selesele le mea na latou lūlū: o lo latou faalotolotolua i le galuega na latou maua ai seleselega ma faasiliga itiiti. E oo i le lagi ma le lauelele na usita'i i le Atua e taofi le sau i luga o mea totō ma lo latou fua mai. Na tuuina atu e le Atua se folafolaga matagofie, ¹³*O a'u, ou te ia te outou*. Ona ia lagaina lea o loto o ta'ita'i e to'a lua, o Serupapelu le alii pule ia Iuta ma Iosua le Ositaulaga Sili, faapea tagata na totoo o le nuu. Na faalototeleina i latou e le upu a le Atua ala mai i lana perofeta, ma tuuina atu ai o latou loto uma i le polokalame toe fausia o le malumalu.

Aso Sa, 21 Novema 2021

Malosi i le Alofa

Tusi Faitau: Sakaria 10.

“Ou te faanofomauina foi i latou, auā ua ou alofa mutimutivale i ai...⁸Ou te mapumapu atu ia te i latou, ma ou faapotopotoina i latou.”

O le ā lau faauigaina o se Kerisiano malosii: se tagata e to'aga, mataala e fiafia e si'i mau mai le Tusi Paia, fuafua polokalame, faasa'osa'o amio sesē ma faaola i agaga? O le Atua o loo fetalai, *'O o'u ala e lē o outou ala ia'*, ua na faasino mai, o Lona finagalo moni i le uiga o le malosii, mata e lē tutusa ma lo tatou manatu. I le Mika 6:8 tatou te maua ai le talaaga

o se tasi e malosi i le malosi o le Alii, e faatino i se olaga amiotonu, alofa ma loto maualalo – le ituaiga malosi e maua mai ina ua ola i taimi uma e tusa ma le finagalo o le Atua. O lea tagata atonu e foliga malosi pe leai foi; o lo latou malosi e maua mai le faalogo, faatali, ma usitai i le Atua, latou te miti’ia lona alofa, e maitau le taimi na te valaau mai ai ma faapotopoto atu i latou (f.8). Ou te faatusaina le alofa o le Atua e pei o se maneta. A o faateleina pea tagata latou te faataga i latou e tosina atu i le lautele o lona malosi, ua faapena foi ona faateleina le lautele ma le malosi o le maneta; o lona paoa na te tosina ma faapotopoto atu tagata o i fafo, i latou e tali atu ma gaua’i i le toso atu malosi o lona alofa. O le malosi i le Alii, o lona uiga ia gaua’i atu i le faatosina mai o le alofa o loo ia pulea malosi lo tatou faataute’e ma lēsaogalemua. Pe a avea i tatou o se vaega o lona fanua faa-maneta, o le a tosina mai ai foi ma isi i lona malosi.

Aso Sa, 28 Novema (Aso Sa o le Etiveni)

Tamā na faavaeina

Tusi Faitau: 2 Samuelu 22:29-37

“²⁹Auā o oe lava le Alii e, o lo’u lamepa; e faamalamalamaina foi e le Alii lo’u pouliuli.”

O le Aso Sa o le Ateveni o le amataga lea o le tau e faatalitali ai le afio mai o Keriso, le malamalama o le lalolagi. I le tele o Ekalesia, o le ulua’i molīga’o i luga o se pale Ateveni e tutu, e faailoga ai le amataga aloaia o le vaitau. O le aganuu faa Agelikana, o le ulua’i molīga’o lea e faamanatu ai Augātāmā - i latou na faavaeina Isaraelu. E faamanatu mai ai o le Mesia e ona le aso fanau lenei o tatou faatalitali i ai, ua leva lava ona valoia ma tālia. E manatua ai foi o le Alo o le Atua na mulimuli i tulagavae o i latou na muamua valaauina e le Tama: Aperaamo, Isaako, Iakopo.

O upu i le Tusi Faitau o lenei aso mai le pese faafetai a Tavita i le 2 Samuelu o ni faamanatu, o le Atua o le au Pateriaki sa faamaoni pea i folafolaga na fai ia i latou. Folafolaga faasino i le Alii le Atua o Isaraelu o loo ta’ita’i pea e pei o se lamepa i le pogisā. A o aga atu le nofoaiga a Tavita i lona faai’uga, ua uma ona ia faataatia le faavae o loo fausia a’e ai i luga le nuu o Isaraelu, ma taualuga ai i se suli o Tavita, o le a fanau mai i Peteleema, ma talatala mai ai se vaitaimi fou i le mafutaga a le Atua ma ona tagata. I lenei aso ua amataina ai le vaitau fou, le Ateveni, ia manatua le faavae o loo ati a’e ai lo tatou faatuatua.

O E U A FAI I LAGI...

FAASOUTELE SAVALIGA TK

14/8/1945 - 17/10/2021 (76+2+4)

O le Tiakono EFKS Tanoalei’a sa soifua mai i ona matua o Poai o le nuu o Vaie’e ma Fialuma o Uafato Fagaloa, i le Aso Lua 14 Aokuso 1945, a e na faamānavaina ana galuega i le Aso Sa 17 Oketopa 2021, ua 76 ai tausaga o lona soifua. Sa faaipoipo atu ia Toeolemu i le tausaga 1978. E to’a 6 o la’ua alo, a e 17 fanau a fanau. Sa galue i le Ekalesia i lona Ofisa Tutotonu o se kamuta mo tausaga e tele. Sa aulotu foi i Apia-Uta mo ni tausaga pe 4, ona siitia mai lea ma nonofo i Tanoalei’a i le tausaga 1990, ma aulotu ai i le EFKS Tanoalei’a. Sa avea ma Pulenuu o Vaivase-uta mo tausaga e 3. Sa usufono i le Fono Tele i Malua. O taimi o lona malosi sa i ai i le Aufaipese, sa faapea foi ona auai i le Autalavou, seia oo ina lē faigofie ona auai ona o gasegase o le tino. O se tagata e fiafia i le lotu, o se tasi o Tiakono ua leva ona auauna i le Alii i lenei tofi. Sa fai ma komiti o le Fale o le Pulega i Malua mo tausaga e tele, seia oo ina fai ma ta’ita’i komiti o le Fale o le Pulega, ona o lona faatuatuaina tele.

O lona toe sauniga sa faia lava i le malumalu EFKS Tanoalei’a i le Aso Toonai, 30 Oketopa 2021. O a’u sa ta’ita’i i lona toe sauniga. Sa molimau Omeka Faasou e fai ma sui o le fanau. Sa molimau e fai ma sui o le aiga o Toe, ia Tumama Mole Faoasau, a o Luaitalo Setima Lefaoese, ma Ivana Eli sa molimau e fai ma sui o le aiga o Faasou. Sa molimau foi le susuga i le Toeaina o Siolo Tauati FT ona o taimi sa latou lolotu ai i Apia-Uta. O a’u sa molimau mo le tamā ma lona soifua auauna i Tanoalei’a. O le susuga i le faifeau o Charlie Banse na molimoli mai le sa o le tamā, ma faitau le Tusi Paia; a o le susuga Tupu Selu FM (Tausi Matagaluega Ekalesia Metotisi Vaivase Uta) sa saunia le tatalo. O le afioga Taitaifono Komiti Au Toeaina, susuga Asotasi Gu Time FT na saunia le lauga ma molimau foi mo le tamā ia Faasou i le mafutaga i Uafato. Na mae’a le sauniga ona matou malaga atu lea i Uafato Fagaloa mo ona toe sauniga. O le susuga i le Toeaina ia Asotasi Gu Time FT, sa taitai i ona toe sauniga i lona oliolisaga tumau. Ona faamavae atu ai lea i le Pese a le au faatuatua, ‘Talofa, uso e, tofaina oe.’ *“²¹Faauta o u o loo i ou tala atu; alu ia oe, auā ua auina atu oe e le Alii.”* **1 Samu.20.** Tofa soifua Faasou Savaliga, ia manuia lau malaga; tatou te toe feiloa’i foi i se aso.

Enefatu Lesa FT, EFKS Tanoalei’a, VAIMAUGA

O E UA FAI I LAGI FOLAUGA

VAIMASENU'U LEALI'IFANO- VALEVALE DR. TAMANA IOPU

TANIELU (AF).

18/4/1948 - 17/6/1921 (73+2+4)

O Vaimasenuu Leali'ifanolevalevale Dr. Tamana Iopu Tanielu o le A'oa'o Fesoasoani a le EFKS Vaiala. O Ianuari 1999 sa fa'aaogaina ai lona tofi A'oa'o Fesoasoani i Vaiala nei, ina ua liliu mai Auala, Savaii sa galulue ai i le ta'ita'iga a le susuga Amosa Tanielu FT. Ae sa galulue muamua atu i EFKS Apia Uta, Dominguez Congregational Christian Church i California Amerika, faapea EFKS Ululoloa ma Siusega, ona toe taliu mai lea ia Aperila 2019 ma toe fa'auau lona tofi A'oa'o Fesoasoani i Vaiala, Pulega Vaimauga i Sisifo i le Matagaluega Apia i Sasa'e (a e le'i vaeluaina le Matagaluega), seia o'ona ina vala'auina e lona Matai silisili i le lagi.

Ou te maitauina i lenei tamā, e fai le Matafale iinei i Vaiala, e galulue ai ma le tina ia Niuafolau ma le fanau; ae faapea foi ona tautua i le matafale a lona aiga i le EFKS Ululoloa ma Siusega faapea EFKS Auala i Savaii. O se tagata galue ma tautua lotu.

E pele ia te ia lona Tofi A'oa'o Fesoasoani. Po o fea lava e fealua'i ai, e alu lava ma tau'ave lana A'oa'o Fesoasoani e galue ai, ma fa'aaogā ai lona malosia, aemaise o mea alofa e tele a le Atua na foa'iina mo ia. O Vaimasenuu o se alii fomai (Medical Doctor) sa galue ai i tausaga e tele i le Malo o Samoa ma ona tagata; o ia foi o se Alii Loia, a o se Matai foi sa tausaga ona aiga.

Po o le a le tele o ona pulou sa galue ai, e lē tu'ua ai pe faatamala i ona tiute i le Ekalesia. Po o le a le mamao o Siusega e o'ona mai lava i le 5 i le vaveao o Aso Toanai i Lotu Au Leoleo i Vaiala nei. A oo foi i taimi o Lotu Au Taumafai, e tulituli mai lava le ta o le 4 i afiafi o Aso Sa. O isi taimi ou te vaai atu, ua sau na o ia i lana taavale, ua topetope mai e tulituli le lotu. O lona faletua ia Niuafolau Fau ma le fanau e galulue i le Aoga Aso Sa, Mafutaga a Tina, le Autalavou faapea le Aufaipese.

E auai i a matou filifiliga ma e faatupu manatu a sona taofi mo le atinaeina o le Ekalesia. O ona manatu foi e lu'i ai isi mea lelei e le'i mafauina. O ia o se tasi o lo'o i totonu o le Komiti Saili tupe mo le Galuega o le Fale o le Faifeau. O lona uiga o se tagata

faamaoni ma galue punoua'i i ona faiva ma tiute ua faasino mai e le Alii. Faafetai tautua i le Atua. *Faafetai molimau i le toto tāua o Iesu, ua sisina ai ofu o le Au Paia, e alofa Iesu ia te oe.*

O le faasologa o ona toe sauniga:

(i) Aso Sa 27 Iuni 2021 @ 3.30pm. Sa lolotu faatasi ai ma le EFKS Ululoloa ma Siusega, le Ekalesia sa fesoasoani ma lagolago ai i lona tau amataina mai. Na ta'ita'i le susuga i le faafeagaiga Kerisimasi Sani FS, fai le Lauga ma auala mai ai le molimau faaleagaga. O A'oa'o Fesoasoani ia Taupa'u Mika Leo AF na tatalo, a o AINU'Ū LISALE TUIOTI AF na molimau foi ma faitau le Tusi Paia. Na molimau le au matutua, le faletua foi ia Niuafolau Fauolegogo i la latou mafutaga, ae maise lo latou sao i le atiina a'e o le Aulotu i Ululoloa ma Siusega i lona amataga mai.

(ii) Aso Sa 4 Iulai 2021 @ 2.00pm. O lona sauniga faaleaiga sa faia i le EFKS Vaiala. Na ta'ita'i le susuga Olikena Tanielu FS ma faaulufale le sa o le Aoa Fesoasoani Foma'i. O le Tusi Paia na faitau e Maleifua Tanielu FS (Faatonu Aoaoga Kerisiano), o Napoleone Vaiaso FS (EFKS Salua-uta) na tatalo, a o Ailani Tanielu FS na lauga. Sa tele ma tamaoiga molimau a sui o le aiga. Ona mapu atu lea i lona maota i Siusega mo leoleoga o le po.

(iii) O lona Toe Sauniga na faia i le Aso Gafua, 5 Iulai 2021 i le malumalu EFKS Vaiala. O a'u na ta'ita'i ma faia le Molimau faale-Agaga faapea ma le Lauga. Na faaulufale lona sa i totonu o le malumalu e le susuga ia Kerisimasi Sani FS (EFKS Ululoloa & Siusega). O le faitauina o le Tusi Paia sa faia e Mulitalo Tini (AF Vaiala), a o le Tatalo na saunia e Valavalatumanu Siaopo Pese (AF Vaiala). Na faamae'a le sauniga i lona oliolisaga tumau i lona aiga i Siusega, ma faamavae atu ai i le Pese Faamavae masani a le Au Kerisiano EFKS.


“O a'u nei o le toe tu ma le ola, o le faatuatua mai ia te a'u, e ui lava ina oti, a e ola lava ia.”
“Le auuuna lelei e, ma le faamaoni, ulufale mai ia i le fiafia o lou Alii”.

Faamaise le Atua i le tinā ia Niuafolau Fauolegogo, le fanau ma aiga faapea uo pele.

*Saunia: Susuga Iese Uele FS,
EFKS Vaiala,
Matagaluega VAIMAUGA.*

O Ē UA FAI I LAGI FOLAUGA

VAIMASENU'U LEALI'IFANO-
VALEVALE DR. TAMANA IOPU
TANIELU (AF).



FAASOUTELE SAVALIGA (TK)



NISI O LE AU FAAU'U, MATUA MA AIGA



Rev. Mani & Sareta Nepo, sui o aiga ma nisi tama fanau A'oa'o Faau'u